

Inatsisartut isummerfigisassaattut siunnersuut, Naalackersuisut peqquneqassasut naartunermi, erninermi meeravissartaarnermilu sulinngiffeqartarnek pillugu Inatsisartut inatsisaata nr. 5 19. november 2020-imeersut allanngortinneqarnissaanik imaasillugu, angajoqqaatut sulinngiffeqarnek sapaatit akunnerinit 21-nit sapaatit akunnerinut 37-inut sivitsorneqassasoq aammalu angajoqqaat kiffaanngissuseqarlutik namminnek sulinngiffeqarnermik aaliangiisinnaassasut.

(Inatsisartunut ilaasortaq Anna Wangenheim, Demokraatit)

Akissuteqaat

(Isumaginninnermut, Ilaqutariinnut, Suliffeqarnermut Nunamullu Namminermt Naalackersuisoq)

Siullermeerneqarnera

Naalackersuisut Inatsisartut aalajangiiffigisassaattut siunnersuut saqqummiunneqartoq pillugu qujassuteqarput.

Inuiaqatiinni ilaqtariit tunngaviupput. Nalunngilarput meeqqamut inoorlaamut piffissaq siulleq qanoq pingaaruteqartigisoq meeqqallu atugarissaarneranut ineriartorneranullu aalajangiisuusoq. Taamaattumik Naalackersuisunut pingaaruteqarpoq qulakkiissallugu, innuttaasugut mikinerpaat angajoqqaavilu pitsaanerpaamik aallartinnissaat ajunngitsunik toqqissisimanartunillu sinaakkuserlugit. Naalackersuisut angajoqqaat sulinngiffeqartarnerisa sivitsorneqarnissaat ajunngitsutut isigaat.

Ilaqtariinnermut suliassaqarfik ineriartortuarpoq. Ullumikkut ilaqtariit assigiinngitsorpassuarnik katitigaapput, aamma ataataq sulinngiffeqarnerup ilaanut ilanngunnera nalinginnaaleriartuinnarpoq. Peqatigalugu meeqqat atugarissaarnerat ineriartornerallu pillugit paasisaqartuaannarpugut. Pingaaruteqarpoq inatsisitta malinnaatinneqarnissaat.

Qaammat ataaseq aatsaat qaangiuppoq Kalaallit Nunaanni anaanaaqataasutut nalunaarsortinnissaq periarfissanngormat, taamaalillunilu erninermi sulinngiffeqarnermut pisinnaatitaaffiulerluni. UKA23-mi Inatsisartut ataataaqataasumut erninermi sulinngiffeqartarnek pillugu immikkoortoq sularivaat. Tassani Naalackersuisut siunnersuuteqarput angajoqqaanut suaiaqatigiinnut pisinnaatitaaffiit periarfissallu pillugit nassuiaammik suliaqarniarlutik. Nassuiaat UKA24-mi saqqummiunneqarumaarpoq, aamma suliassaqarfimmi inatsisit qanoq iliorluta pitsanngorsaavigisinnaanerlugit ataatsimut isiginnilersitsissaaq. Tassunga aamma erninermi sulinngiffeqartarnermut pisinnaatitaaffiit ilanngunneqassapput.

Naak ataataq sulinngiffeqarnissamut atuilluarneruleraluortoq, erninermi sulinngiffeqartarnermut tunngatillugu naligiissitaanissamut aqquutissaq suli takeqaaq. Nalunngilarput arnat meerartaarnermut ataatsimut inuunerminni isertitaminnik agguaqatigiissillugu 10 %-ii annaasaraat, angutillu isertitaat ataatsimut isigalugit

sunnerneqartarnatik. Pisuni amerlanerpaani angajoqqaat sulinngiffeqartarnerannik sivitsuineq ullumikkut isumaqassaaq, anaanaasut sulinertik piffissami sivilunerusumi unitsikkallartariaqartassagaat. Naligiissitaanermik nikisitsissagutta, ataataasut ilannguttariaqarpagut. Nunani eqqarlerisatsinni erninermi sulinngiffeqartarnerup ilaanik ataataasunut sivilunerusumik immikkoortinneqartarnerat takusalerparput. Aamma takusinnaavarput iluatsittoq. Iluarsiissut nunatsinnut iluaqutaasinnaammat immaqa piffissanngorpoq isumaliuutigissallugu?

Suliassaqarfimmi iliuuserisinnaasagut pitsanngoriaataasinnaasut amerlaqaat. Taamaattumik Naalakkersuisut isumaqarput, erninermi sulinngiffeqartarneq pillugu malittarisassat iluarsaannissaannut piffissanngortoq. Tamatumani angajoqqaat sulinngiffeqartarnerisa sivitsorneqarnissaat tulluurtuuvoq isiginiassallugu.

Taamatut oqaaseqarluta aalajangiiffigisassatut siunnersuut akuereqqullugu Naalakkersuisut inassuteqarput.